

重編東坡先生外集卷第七十九

小簡

與范元長

北歸

到雷獲所留書承車從磐桓此邦以須一見而某滯
留不時至遂爾遠別且不獲一慟几筵之前者非愛
數舍之勞也以厄困爲畏故爾此老謬之罪想矜察
比日孝履如宜否方此炎毒萬里扶護哀苦勞艱如
何可言忝親友之末不能匍匐赴救已矣不復云也
獨前所見委文字不敢不留意今託少游議其詳餘
節哀自重某不敢拜狀郡君惟千萬俯爲存沒寬心

東坡先生集卷之七十九
自重乞呈此紙

又

某如聞有移黃之命若果爾當自黃而廣須惠州骨肉到同往計公昆仲扶護舟行當過黃又恐公自湖南路行不由江卽不過黃不知某能及公前到黃廣乎漂零江海身非已有未知歸宿之地其敢必會見之日耶惟昆仲金石迺心困而不折庶幾先公之風沒而不忘也臨紙哽塞言不盡意

又

過雷州奉書必達到容南知昆仲皆苦瘴痢又聞

又

承中間郡君服藥疾勢不輕且喜安復侍次致懇千萬寬中保衛爲請

與孫叔靜

昨日辱臨願宿昔之好不替有加感歎深矣屬飲藥汗後不可以風未卽詣謝又在使旌增重悚作捧手教且審尊體佳勝旦夕詣謝以究所懷

又

辱手教伏審晚來起居住勝惠示珠欖頃所未見非獨下視沙糖矣想當一咲

又

前日辱下顧尚未果走謝悚息不已捧手教承起居
佳勝卑體尚未甚清快坐阻談對爲悵惘也惠示妙
劑及方獲之喜甚從此衰疾有瘳矣

又

辱手教具審尊體佳勝甚慰馳仰拙疾亦漸平矣明
日當出詣見堯羊蒙珍惠下逮童孺矣

又

令子重承訪及不暇往別爲愧深矣玆惠菜膳增感
怍矣河源藤已領衰疾可恃矣

又

去德彌月思仰縈懷比日履此新陽起居增勝行路
百阻至英方再宿矣少留數日此去尤艱闕借舟未
知能達韶否流行坎止輒復任緣不煩深念也後會
未卜萬萬爲國自重

又

已別瞻企不去心辱手教且喜佳勝感慰之極早來
風起舟師不敢解舡故復少留因來淨慧與惠州三
道人語爾無緣躬詣臨紙悵惘

又

眉山有巢谷者

初名穀

字元修曾學進士武舉皆無成

篤於風義年七十餘矣聞某謫海南徒步萬里來相勞至新興病亡官為橐殯錄其遺物于官庫元修有子蒙在里中某已使人呼蒙來迎喪頗助其路費仍過永州而南更當資之但未到聞其旅殯無人照管或至壞暴露願公愍其不幸因循巡按至新興特為一言於彼守令得為稍修治其殯常戒主者謹護之以須其子之至則恩及存沒也公若不往新興則告一言于進叔尤幸亦畧曾懇此恐忘尔

又

累歲闊別不意相逢海上握手一笑豈偶然哉亟屬專使教筆具審起居佳勝感慰兼集玉局之除已有訓詞似不妄也得免湖外之行餘生厚幸至英當求人至永請告勅遂度嶺過贛歸隄羨或歸穎曰老兄弟相守過此生矣乍遠為國萬萬自重

又

久留治下辱眷待之厚既過重矣而愛念之意拳拳不已更勤從者遠至金利自惟衰朽何以獲此比來數日思渴不已長至俯邇不克展慶此心南望矣令子煩遠餞不及別狀惟侍外珍愛

與朱行中舍人

違闊茲久向往徒勤比日履茲寒凝起居佳勝承旌
馭已至卽欲走謁謹先奉手啟上問區區

又

某謫居歲久未嘗冠幘比日又苦小癩不能巾裹欲
服帽請見先令咨稟如許乃敢前詣幸不深責

又

真陽一見大慰宿昔忽遽就別悵惘可知行役紛紛
且未有見便尚稽馳問專使厚書且審下車以來台
候康勝感慰兼集某蒙座如昨更五六日離韶愈遠

左右伏冀爲國自重

又

前蒙借示新詩久矣不見斯作也然世俗識真者少
獨唱誰和帳句謝民師公若不以位貌爲間亦庶幾
於班斤郢斲也老拙百念灰寂獨一觴一咏亦未能
忘陋句數首錄寄以爲一笑手啟上謝特知照不深
責也

又

某再拜般家人蒙輟借行計遂辦非眷念特達何以
及此言謝不盡悚息而已

又

近因還使上問必已聞達連雨凝陰遠想台候康勝
某蒙庇粗遣已達虔州少留須水度更半月行也南
海靜治有足樂者想聞妙唱自南而北也後會未期
萬萬若時爲國自重

又

別後兩奉狀想一一聞達比日履茲春和想台候勝
常某滯留船上以待春水至此日未迺發瞻望悵惘
南磁雖遠然雅量固有以處之矣詩酒之樂恨不日
陪接也更與若時爲國保練

又

某已得兩舟尚在贛石之下若月未不至當乘小舟
往就之買公用人以節級持所賞錢竄去又以疫氣
多死亡者自到此亡者四人矣醫藥飲食棺斂殯埋
皆躬自治辦不失所以此求還官舟無用多人故悉
遣回此人皆以指麾嚴切甚得力乞知之適少冗馳
問不盡區區

又

少事不當上煩東莞資福長老祖堂者建五百羅漢
閣極宏麗營之十年今成矣某近爲作記必公見之

東坡先生集卷之十一
矣途中爲告文安國篆得閣額甚妙今封付去人公
若欲觀拆開不妨却乞差一小心人賫付祖堂不罪
不罪

與鄭靖老

到雷州見張君俞首獲公手書累幅欣慰之極不可
云喻到廉廉守廼云公已離邕去矣方悵然欲求問
從者所在少通區區忽得來教釋然又得新詩皆秀
傑語幸甚幸甚別來百難不可勝言置之不足道也志
林竟未成但草得書傳十三卷甚賴公兩借書籍檢
閱也向不知公所存又不敢帶行封作一籠寄邁處
今訪尋 如來有便且寄廣州何道士處已深囑
之必不敢墜某留此過中秋或至月末廼行至北流
作竹筏下水歷容籐至梧與邁約令般家至梧相會
中子迨亦至會矣却雇舟沂賀江而上水陸數節方
至永老業可柰何柰何未會間以時自重

又

某見張君俞乃始知公事中間亦爲小人所摺撫令
史以下固不知退之諱辯也而卿貳等亦爾耶進退
有命豈此輩所制知公竒偉必不經懷也某鬚髮盡
白然體力猶不減舊或不卽歿聖恩汪洋更一赦或

東坡先生集卷之十一
許歸農則帶月之鋤可以對秉也本意專欲歸蜀不知能遂此計否蜀若不歸卽以杭州爲佳朱邑有言子孫奉祠我不如桐鄉之民不肖亦云然外物不可必當更臨事隨宜但不卽歿歸田可必也公欲相從于溪山間想是真切之願水到渠成亦不須預慮也此生真同露電豈通把玩耶

與歐陽晦夫

愁霖終日坐企談晤不審尊候佳否地獄變相已跋其後可詳味之似有補於後者并字數紙納去其所苦已平無憂聞少游惡耗兩日爲之食不下然來說得瘵裂未是全信非久唐薄必有書來言旦夕語別次仁人之餽固當捧領但以離海南僭人爭致贍遺愛之則若饗餐然所以一路俱不受若至此獨拜寵賜則見罪者必衆謹令馳納千萬恕察仍寢來耗幸甚

荅陳公密

途中喜見令子得聞動止之詳繼領專使手書且審卽日尊體清勝感慰無量差借白直地乘擔索一一仰煩神用孤旅獲濟荷德之心未易云喻來日晚方達蒙里卽如所教出陸至南華少留半日卽造宇下

東坡先生文集 卷之十九
一吐區區預深欣躍

又

窮達屑栖獲見君子開懷抵掌爲樂未央公旣王事
靡寧其亦歸心所薄忽遽就別如何可言別後亟辱
惠書詞旨增重具審起居佳勝感慰深矣其已度嶺
已脫問鵬之憂行有見蝸之喜但遠德惘惘未忘于
情新春保練以胥驛召行役艱羈託庇以濟分貺丹
劑拯其衰疾此意豈可忘哉其餘言謝莫盡令子昆
仲比辱書示未暇修荅悚息曹三班謙幹非常
遠送餽感二絕句發一大笑

荅陳承務

傾蓋一咲慰喜殊深奉違信宿懷想不已亟辱手教
且喜起居佳勝已到蒙里承文丈借重人輜孤旅獲
濟感幸不可言愈遠萬萬若時自重

又

孤拙困踣言無足採是下獨悅之少年敏銳所存如
此實增歎 事以臨利害不變爲難也

荅黃敷言

豐承寵訪感慰兼集晚來起居佳勝承來晨啓行以
衰病畏寒不果往別悚忤深矣衝涉雨霰萬萬保練

謹令兒子候遠

又

少事千煩一書與惠州李念四秀才告爲到廣州日
遂遣一人達之不罪交代民師且爲再三致意

荅南華明老

衰病復過南華深欲一別祖師因見仁者遽辱專使
手書何慰如之即日履此薄寒法履佳勝旦夕離英
但江路方欲寸進不卽會見企望之極惟萬萬爲
自愛

又

流浪臭濁久矣道眼多可傾蓋如舊清游累日一洗
無餘幸甚幸甚專使會手書具問別後法體安穩爲
慰久留贛上待水猶更旬日南望山門馳神香靄更
祈若時爲衆保練

又

某以促裝登舟冗甚作書極草草籠示四韻可謂奇
特聊荅四句想一大笑也石刻已領感感潘生果作
墨否如成寄一丸伯固念親懷歸甚矣道話解之

荅李端叔

辱書多矣無不荅者然終不一荅非獨衰病簡懶之

過實以罪垢深重不忍更以無益寒溫之間玷累知友然竟不免累公慙負不可言比日承已赴潁昌伏計起居佳勝眷聚各康健某移永州過五羊徑度大庾至吉出陸由長沙至永荷叔靜及諸人照管不甚失所叔靜拏舟相送數十里大浪中作此書無它祝惟保愛外酌酒與婦飲尚勝俗侶對梅二丈詩云耳

荅錢濟明

去歲海南得所寄異士太彤清中丹一丸卽時服之下田休休焉蓋數日後又得道所賣來手書今又領教誨及清詩數篇高妙絕俗想見謫居以來探道者書雲升川壘可慕可畏可歎可賀也及錄示訓詞語以所不及此曾子所謂愛人以德者敬遵用不敢忘幸甚幸甚

又

已到虔州二月十間方離此此行決往常州居住不知郡中有屋可得以典買者否如無可居卽欲往舒州真州皆可如聞常之東門外有裴氏宅出賣虔守霍于侔大夫言告公令一幹事人與問當若果可居爲問其直幾何度力所及卽徑往議之俟至金陵當別遣人咨稟也若遂此事與公杖履往還樂此餘年

踐哀詞中始願也張嘉父今安在想日益不止塗中
見秦少游奄忽爲天下惜此人物哀痛至今聞魯直
無咎輩皆起而公獨爲獅子所齧尚棲遲田間聖主
天縱幽蔀畢照公豈久廢者惟萬萬寬中自厚

又

某又忽聞公有閨門之戚悲惋不已賢淑令人久同
憂患乍失內助哀毒何堪然人生此苦十人而九結
髮偕老殆無而僅有也惟深照痛遣勿留胃次令子
哀疚難堪惟當勉爲親庭節減摧慕本欲作慰疏適
旅中有少紛擾燈下倦怠不能及也千萬恕察某也
住常卽自與公相聚若常不可居亦須到閨與程德
孺相見公若枉駕一至金山又幸也

重編東坡先生外集卷之七十九終

重編東坡先生外集卷第八十

小簡

北歸

荅蘇伯固

人至辱書承別後起居住勝感慰深矣念親懷歸之心
儻時所以易此願未有以爲計當且少安之神明
知公心如此當自有感應非久見師是當謀之某留
虔州已四十日雖得州猶在贛外更五七日乃乘小
舫往卽之勞費百端到此長少臥病幸而皆愈僕卒
死者六人可駭住處非舒則常老病惟退爲上策子
由聞已歸至潁昌矣會合何日萬萬保齋

又

某凡百如昨但拊示書易論語三書卽覺此生不虛
過如來書所論其他何足道三復誨語欽誦不已寄
惠鍾乳及檀香大濟要用乳已足剩不煩更寄也感
愧之至江晦叔已到霍子侔往太和聽命三兒子皆
促裝登舟未暇上狀春暉亭記亦以忙未暇作少閒
當爲作也令子疾知減退可喜可喜

又

佳計龍舒爲多太益如命取去爲暑中浮瓜沉李之
一快也論語說得暇當錄呈源修二老行當見之并
道所論也到虔州日往諸刹游覽始見中原氣象春
然不肉而肥矣何時得與公久聚盡發所蘊相分付
耶龍舒聞有一官庄可買已託人問之若遂則一生
足食杜門矣燈下倦書不盡所懷

與錢志仲

兩日不見渴仰兼懷切惟起居住佳勝昨日水東尋幽
訪古頗有所得恐欲知之藥方已領感感

又

流落晚塗始獲瞻奉願遇之重有過平生幸甚幸甚
別來伏惟起居住佳勝漲水遂失瀨險不覺到言皆德

東坡先生全集 卷之八十一
一
庇所及其餘未易一二道謝也日遠後會未期豈免
悵戀

又

某此去不復滯留至安居處當縷細馳問不敢外輒
用手啓恃深眷也烏絲當用寫道書一篇非久納上
惡詩不足錄也事簡客稀高堂清風有足樂者想時
復見念耶吉州幕柳致與之久故知其吏幹過人不
能和衆多獲嫌忌然其實無它也憔悴將老矣念非
大度盛德孰能收而用之試以衆難必有可觀藥有
毒乃能已疾馬不蹄嚙多拙於行惟深念才難勿言

全也若公遂成就之此子極有可採必爲門下用持
明照僭言死罪死罪

與劉器之

志仲本以烏絲欄求某錄雜詩耳某自出意欲與寫
廣成子解篇舟中熱倦遂忘之然此意終在也今豈
可食言哉病不能作志仲書乞封此紙去

與寇君

經宿雨涼起居住勝昨辱迂顧稍聞餘論退想忠愍
之英烈有槩乎中衰病不出無緣上謁少選解去惟
萬萬自重

與人

遠在書教存問甚厚兼審比來起居佳勝慰感兼集
寄示石刻仰佩至意何時會合少發所懷臨書但有
慨歎

又

某日望歸蜀耳終當過岐雍間徜徉少留以償宿昔
之意君自名臣子才美漸著豈復久浮沉里中宜及
今爲樂異時一爲世故所靡求此閑適豈可復得耶
偶記舊與彭年一詩讀之蓋淚下也斯人有才而病
廢故常多感慨可念可念聊復錄此奉呈想亦爲之
惘然也

與宋漢傑

某初仕卽佐先公蒙願遇之厚何時可忘流落濶遠
不聞昆仲息耗每以惋歎爲書累幅話及疇昔良復
慨然三十余年矣如隔晨耳而前人彫喪略盡僕亦
僅能生還人世一大憂仰仰百變無足怪者唐輔令
兄今復何在未及奉書因信略道區區某只候水來
卽行矣餘留面盡

又

前日裁謝草略重煩問訊眷意愈厚感愧不已仍審

起居住佳勝寵賜新詩詞格甚美伏讀慰喜但恨衰晚無以當此嘉貺也

與胡郎仁修

某慰疏言不意變故奄罹艱狀伏惟孝誠深篤追慕痛裂荼毒難堪奈何奈何此日攀號愈遠摧毀何及惟順便從禮以全純孝某未獲躬詣靈幃臨書哽噎謹奉慰疏不次

又

某得彭城書知太夫人捐館聞問哀痛不已行役無便未果奉疏人至忽辱手書伏案攀慕之餘孝履粗遣至慰至慰某本欲居常得舍弟書促歸許下甚力今已決計沂沐至陳留陸行歸許矣旦夕到儀直暫留令邁一到常可以款見矣

又

小二娘知持服不易且得無恙伯翁一行甚安健得翁翁二月書及三月內許州相識書皆言一宅康安亦得九郎書書字極長進今已到太平州相次須一到閩州金山寺但無由至常州看小二娘有所幹所闕一一早到來餘萬萬自愛

與外甥柳閔

東坡先生外集 卷之八十一 五十一
展如外甥人來得書知奉太夫人康寧新婦外孫各
無恙北歸萬里無足言者獨不見我令妹賢妹夫此
心如割介夫何負亦早世念之痛不去心數年豈賢
雋厄會耶相見當一痛以寫之茲不一一

與人

嶺海濶絕不謂生還復得瞻奉慰幸之極此日履此
秋涼起居佳福少選到岸卽遂伏謁

又

某疲病加乏使令輒用手啓通問持公雅度濶略細
謹耳然亦皇恐不可言也

荅虔人王正彥先生

辱教承起居佳勝沐饋遺重增感灼茗布領抹皆珍
物已捧領訖今日與家人輩遊東禪及景德如相訪
就彼亦可

與程德孺運使

近蒙專使至虔遠致時服寢衣之餽尋附啓布謝必
達比日起居住佳勝眷愛各康健某候水過贛今方達
南康軍約程四月末間到真州當遣兒子邁往宜興
取行李某當泊舡瓜州以待之不知德孺可因巡按
至常閩相約同遊金山否患難之余老兄弟復一相

東坡先生文集卷之八十一
聚曠世奇事也可不略論及餘惟萬萬自重

又

某此行本欲居淮浙間近得子由書苦勸來穎昌相聚不忍違之已決從此計沂汴至陳留出陸也今有一狀干漕司一座舡乞早爲差人下令且在常州岸下候邁到彼乘來切望留意早早得之免滯留爲幸懿叔必常得信令子新先輩必已赴任未及書因家信道區區

又

告爲買杭州程奕筆百枝及越州紙二千幅常使

展手者各半不罪不罪止輔知已到京非久上狀乞因信至懇

荅清涼長老

昨辱佳頌見貺足爲衰朽之光未緣面謝

與李端叔

近託孫叔靜附書遠遞得達否比來尊體何如眷聚各計安勝某蒙恩復舊秩領直祠世間華仕豈復有過此者乎伏惟君恩之重不可量數遙知朋友爲我喜而不寐也今已到虔州卽往淮浙間居度多在毘陵也子由聞已歸許秉燭相對非夢而何一書乞便

東坡先生集卷之八十一
送與餘爲萬萬目重

又

某年六十五矣體力毛髮正與年相稱或得復與公相見亦未可知既往者皆夢已後者獨非夢乎置之不足道所喜者在南海了得易書論語傳數十卷似有益于骨朽後人耳目也少游遂卒于道路哀哉痛哉世豈復有斯人乎端叔亦老矣迨云鬚髮已皓然頰極丹且渥僕亦正如此各宜闕嗇庶幾相見也兒姪輩在治下煩與教督之一書幸送與大醉中書不成字千萬不罪

又

某契濶八年豈謂復有見日漸近中原辱書尤數出于望外比日起居住勝某已決歸許如所教而子邁遽捨去深以爲恨見報除輦運似亦不惡近日除日時有如人所料者則此後端叔必已信眉矣但老境少安餘皆不足道乍熱以時自重

又

某本以囊裝罄盡而子由亦久困無餘故欲就食淮浙已而深念老境知有幾日不可復作兩處又得子由書及見教語尤切至已決歸許下矣但須至少留

儀真令兒子往宜興刮割變轉往還須月餘約至許
下已七月矣去歲在廉州託孫叔靜寄書及小詩達
否叔靜云端叔一生坎軻晚節亦牢落正賴魚軒賢
德委曲相順以忘百憂此豈細事不爾人生豈復有
佳味乎叔靜姻友想得其詳故輒以奉慶忝契不罪

荅陳傳道

久不上問愧負深矣忽枉手信勞來勤甚夙昔之好
不替有加兼審比來起居佳勝感慰兼集新舊諸詩
幸得竟覽不意餘生復見斯作古人日遠俗學衰
作者風氣猶存君家伯仲間近見報履常作正字

仲介特之操處險益勵時流孰知之者用是占之知
公議少伸也傳道豈父堯庫者未由面談惟冀厚愛
自重

又

來詩欲和數首以速欲發此介故未暇閑居亦有少
述作何日見昆仲稍出之宮觀之命已過矣此外
只有歸田爲急承見教想識此懷履常未及拜書因
家信道區區

與李方叔

頃年於稠人中驟得張秦黃晁及方叔履常輩意謂

東坡先生文集 卷之八十一
天不愛寶其獲蓋未艾也比來經涉世故間關四方
更欲求其似邈不可得以此知人決不徒出不有立
于今必有覺于後也如方叔飄然布衣亦幾不免淳
甫少游又安所獲罪于天遂斷弃其命言之何益付
之清議而已憂患雖已過便宜慎口以安晚節

又

承示諭長安君偶得臂痛不能舉某於錢昌武朝議
家傳得一方云其初本施渥寺丞者因寓居京師甜
水巷見乞兒患兩足拳捺履手行渥常以飲食錢物
遺之凡期年不衰尋赴任數年而還復僦曩居則乞

兒不見矣一日見之相國寺前行走如飛驚問之則
曰遇人傳兩藥方服一料卽能行矣服之立效其後
已傳數人皆神妙但手足上疾皆可服不拘男子婦
人秘之其方原只是王氏博濟方中但人不知耳博
濟誤以虎脰爲腦便請長安君合服必驗

又

朝雲者死于惠州久矣別後學書頗有楷法亦學佛
法臨去誦六如偈以絕葬之惠州栖禪寺僧作亭覆
之榜曰六如亭最荷夫人垂顧故詳及之

荅錢濟明

來人領手教及二詩乃信北歸災退併獲此佳寵幸甚幸甚又知詩人窮而後工然詩語朗練無衰氣如季札者聽亦有以知君之晚節也比日起居佳勝某此去不任滯然風水難必期公閑居難以遠涉須某到真遣人奉約與德孺同來金山乃幸也所懷未易盡言併俟而陳餘惟萬萬自重

又

某得來書乃知廖明略復官參寥落髮張嘉父春秋博士皆一時慶幸獨吾濟明尚未何也想必在旦夕因見參寥復服恨定慧欽老早化然彼視世夢幻安以復爲兒子追道其化於壽州時甚竒特想必聞其詳乃知小人能害其衣服爾至不可壞者乃當緣厄而愈勝尔舊有詩八首寄之已寫付卓契順臨發乃取而燔之盖亦知其必厄于此等也今錄呈濟明可爲寫放舊居掛劍徐君之墓也欽詩乃極佳尋本未獲有法嗣否當爲載之其語錄中契順又不知安在矣吾濟明刻舟求劍皆可咲也

又

居常之計本久定矣爲子由書來苦勸歸許以此胸中殊未定待而議決之所示孫君宅子甚感其厚意

具爲多謝上元令侄行見之矣王范二君處皆當力
言也劉道人若能同濟明來會深所望未敢奉言且
爲致此意

荅廖明略

遠去左右俯仰十年相與更此百罹非復人事置之
勿污筆墨可也所幸平安復見天日彼數子者何辜
獨先朝露吾儕皆可慶寧復戚戚于既往哉公議皎
然榮辱竟安在其餘夢幻去來何啻蚤蚌之過目前
也矧公才學過人遠甚雖欲忘世而世不我忘晚節
功名直恐不免耳老朽欲屏歸田里猶或見蜂蟻之
微尋以變滅終不能道區區仰念有以廣公之意者
切欲作啓事上荅冗迫不能就惟深亮之

又

衰陋之甚惟有歸田杜門向壁更無餘事示諭極過
當讀之悚汗毗陵異政謠頌藹然至今不忘爲民除
穢以至萬尾吳越戶知之此非特見子能言也聖主
明如日月行遂展慶衆論如此日昏不能多書悚作
不已

重編東坡先生外集卷之八十終

重編東坡先生外集卷第八十一

小簡

荅孔毅夫

北歸

久不通問計識其無它北歸所過皆公之舊迹或見
清詩以增感歎忽辱手書及子由家訊窮途一咲豈
易得哉比日起居住佳勝眷聚各康寧仙舟想非久到
闕其當老江淮間矣會合未期萬萬自重

又

中間常父傾逝不能一奉慰疏但荒徼一慨而已慚
負至今承諭子由不甚覺老聞公亦蔚然如昔不肖

東坡先生集卷之八十一
雖瞞然亦無苦恙劉器之乃鐵人但逝者數子百身
莫贖柰何柰何江上微雨飲酒薄醉書不能謹

荅蘇伯固

辱書勞問愈厚寔增感慨兼喜尊體佳勝今日到金
山寺下雖極艱涉然尚可寸進則且乘大舟以便幼
累必不可前則固不可辭小艇也餘生未知所歸宿
且一切信任乘流得坎行止非我也離英州日已得
玉局敕感恩之外實荷餘庇得來示又知少游乃至
如此某全軀得還非天幸而何但益痛少游無窮已
也同貶死去大半最可惜者范純父及少游當爲天
下惜之柰何柰何予由想已在巴陵得官觀指揮計
便汭流還穎昌某行無緣追及昨在途中風聞公下
痢想已安復矣

荅王幼安

索居八年未嘗一通問每以慚負屢得許下兒侄書
云比來親族或斷往來惟幼安昆仲待遇加厚聞之
感激人來辱書累幅陳義慨然如接古人語信王謝
風氣傳之有自也老病強荅不復成語不罪不罪

又

某初欲就食宜興今得子由書苦勸歸穎昌已決意

東坡先生外集 卷之八十一
從之矣舟已至廬山下不久當獲造謁未間異若時
保齋

又

蒙示諭過重雖愛念如此然憂患之餘未忘憂畏朋
友當思有以保全之者過實之譽願爲掩諱之也許
暫假大第幸甚幸甚非所敢望也得託庇偏廡謹不
敢薰污稍定居當求數畝荒隙結茅而老焉若未卽
填溝壑及見伯仲功成而歸爲鄰里房舍客伏臘相
勞問何樂如之餘非面莫究

荅胡道師

再過廬阜俯仰十九年陵谷草木皆失故態栖賢關
先之勝殆亡其半幻景虛妄理固當爾獨山中道友
契好如昔道在世外良非虛語道師又不遠數百里
負笈相從秉燭相對恍若夢寐秋聲宿雲了然在吾
目中矣幸甚幸甚乍別遠枉尊使手書且審已還舊
隱起居甚常明日解舟愈遠萬萬以時自重

與李公擇

逆風數日爲左右滯留而孤旅蒙幸多矣但以久別
得一見風度亦不復以別去爲戚也比日伏惟起居
佳勝小舟汎汎風浪聲中此懷又費照遣矣古帖納

東坡先生集 卷之十一 三
上餘萬萬自愛

又

兩日連見忽忽竟何言喧和起居何如夷仲送王徐州詩有見及語方是時人以相識爲諱欲一見面道此爲笑竟不見可太息也適所白是宗人棫雅州幕不一

與黃師是

北歸江淮間蒙四遣人墜教且致家信非眷戀特深何以及此比日履茲畏暑起居清勝少御之除未滿公論但朝廷正欲君子在內耳行別展慶未間萬萬若時自重

又

子厚得雷聞之驚歎彌日海康地雖遠無瘴癘舍弟居之一年甚安穩望以此開譬太夫人也

又

人來兩捧教賜具審起居康勝仲子之戚惟當日遠日忘想痛割腸何所及中年已後出涕能令目闇此最可惜用鄙言甚勿出一滴也兒子之變雖深比之自愛其目豈不有間幸深念之餘惟萬萬爲國自重

又

東坡先生集卷之八十一
行計屢改近者幼累舟中皆伏暑自愍一年在道路
矣不堪復入汴出陸又聞子由亦窘用不忍更以三
百指委之已決意旦夕渡江居毗陵矣荷憂愛至深
故及此子由一書政爲報此事乞早與達之塵埃風
葉滿室隨掃隨有然終不可廢掃以爲賢於不掃也
若知本無一物又何加焉有詩錄呈簾卷牕穿戶不
肩隙塵風葉任縱橫幽人睡足誰呼覺欹枕床前有
月明一笑一笑

與子由

子由弟得黃師是遣人賫來四月二十二日書喜知
近日安勝兄在真州與一家亦健行計南北居幾變
矣遭值如此可歎可笑兄已決計從弟之言向居潁
昌行有日矣適值程德孺過金山往會之并一二親
故皆在坐頗聞北方事有決不可往潁昌近地居者
事皆可信人所報大抵相忌安排攻擊者衆北行漸
近決不靜耳今已決計居常州借得一孫家宅極佳
浙人相喜決不失所也更留真十數日便渡江往常
逾年行役且此休息恨不得老境兄弟相聚此天也
吾其如天何亦不知天果于兄弟終不相聚乎士君
子作事但只于省力處行此行不遂相聚非本意甚

東坡先生集卷之八十一
五
省力避害也候到定疊一兩月方遣邁去注官迨去
般家過則不離左右也塋地弟請一畝果決八郎婦
可用吾無不用也更破十緡買地何如留作葬事千
萬莫徇俗也林子中病傷寒十餘日便卒所獲幾何
遺恨無窮哀哉哀哉兄萬一有稍起之命便具所苦
疾狀力辭之與迨過閉戶治田養性而已千萬勿相
念今託師是致此書

又

程德孺言弟令出銀二百星見借兄度手下尚未
如此已辭之矣德孺兄弟意極佳感甚感甚數日
甚舟中揮汗寫此不及作諸姪書且伸意夫人晚年
且更慎護勿令小有疾副子孫意五郎婦更與管照
慰安之便令五郎般挈也八郎續親極好但吾儕難
自言可託人與說今師是已除太僕少恐遂北行兄
不能見又恐來省毋蘇州若見當令探其意也少留
真欲緝房緡令整齊也五娘七娘近皆得書與孫皆
安胡郎亦有書來甚安行見之矣

與馮祖仁

某慰疏言承艱咎退居久矣日月逾邁哀痛理極未
嘗獲陳區區少解思慕萬一實以漂寓窮荒人事斷

東坡先生集卷之八十一
絕非敢慢也比辱手疏且審孝履支持廓然逾遠追
勸何及伏冀俯禮適變寬中強食謹奉書上慰不次

又

蒙示長牋粲然累幅光彩下燭衰朽增華但以未拜
告命不敢具啓荅謝感恻不可云喻老瘁不復疇昔
但偶未死尔水道間關寸進二十餘日方至曲江首
當詣宇下區區非面不旣乏人寫大狀不罪

又

昨日辱遠迓喜慰難名客散已夜不敢造門早來又
聞已走松楸未敢上謁領手教愧悚無已至節想佳

孝思難堪奈何奈何來晚當往謁慰

又

節辰蒙惠羊邊酒壺仁者之餽謹以薦先感佩不可
言也

又

兩日冗迫不果詣見伏計孝履如宜欲告借昨日盛
會時作包子庖人告白知朝請絕早遣至不罪不罪
家人輩游南山祖仁若無事可能同至彼閑行否

又

昨日奉辭瞻戀殊甚日來孝履佳否先什輒已題跋

東坡先生文集 卷之八十一 七
鶴鹿馬三軸迫行不暇題謹同納上祖仁方在疚更
不煩遠出昨所云金山之行可罷也乍遠保重

又

辱回教及蒙以巖研法醕嘉蔬瓊果等爲餉已捧領
訖願無以當之適苦嗽昏倦裁謝草草

又

辱牋教累幅文義粲然禮意兼重非老朽所敢當藏
之中笥以爲光寵幸甚幸甚比日孝履何如臨韶累
日疲於人事又苦河魚之疾少留調理乃行益遠愈
增瞻思也歲莫惟更節哀自重

與郭功甫

昨辱寵臨久不聞語殊出意義善所謂得未曾有
經宿起居佳勝閑居致厚餽拜賜慙感只今上謁賜
一肉足矣幸不置酒

又

某今日私忌未敢上謁辱詩和呈爲一笑青皮林一
片不以餉公則無與嘗者矣

荅孔毅父

日至陽長仁者履之百順萃止病廢掩關負暄獨坐
醺然自得恨不同此佳味也呵呵誨諭過重之人修

寫迺以手簡爲謝悚息

荅畢先輩

適辱從者臨貺書教禮義兼重殆非不肖所堪書詞高妙伏讀增歎病不能冠帶遂不果見愧悚無地

與米元章

嶺海八年親友曠絕亦未嘗關念獨念吾元章邁往凌雲之氣清雄絕世之文超妙入神之字何時見之以洗我積滅瘴毒耶今真見之矣餘無足云者

又

兩日來病有增無減雖過關外風氣稍清但虛乏不能食口殆不能言也兒子于何處得寶月觀賦賦誦之老僕臥聽之未半蹶然而起恨二十年相從知元章不盡若此賦當過古人不論今世也天下豈常如我輩曠曠耶公不久當自有大名不勞我輩說也若欲與公談則實未能想當更後數日耶

又

某昨日歸臥遂夜海外久無此熱殆不能堪柳子厚所謂意象非中國人也宗相雖弃世當爲天下惜也餘非面莫究

又

東坡先生集卷之十一
其兩日病不能動口亦不欲言但困卧耳承示太皇
草聖及謝帖皆不敢于病中草草題跋謹具馳納俟
小愈也河水汙濁下流薰蒸益病今日當遷往通濟
亭汨雖不當遠去左右且就快風活水一洗病滯稍
健當奉談笑也

又

昨日詩發一笑耳慎勿刻石太師雄篇已領夾輔且
留下

又

數日不聞來音謂不我顧復渡江矣辱教卽承起居
佳勝感慰倍常匆匆布謝

又

某昨日啖冷過度夜暴下且復疲甚食黃著粥甚美
臥閱四印竒古失病所在明日會食乞且罷需稍健
或雨過條然時也印却納

又

某食則脹不食則羸甚昨夜通旦不交睫端坐餉蚊
子耳不知今夕云何度示及古文幸甚謝帖旣未敢
輕跋欲書數句了無意思正坐老謬耳眠食皆未佳
無緣遂東當續拜簡

某病幾不相見今日始覺有絲毫之減然未能作書也

與錢濟明

一夜發熱不可言齒間出血蚯蚓者無數迨曉迺止
億甚細察病狀專是熱毒根源不淺當專用清涼藥
已令用人參麥門冬茯苓三味煮濃汁渴卽少啜之
餘藥皆罷也莊生聞在宥天下未聞治天下也如此
而不愈則天也非吾過也楊評事與一來亦佳到此
諸親知所餉無一留者獨拜蒸作之餉切望止此而

已

又

家有黃筮畫龍拔起兩山間陰威凜然舊作郡時以
祈雨有應今夕具香燈試禱之濟明雖家居必不廢
閔雨意可來燔一炷香否

又

蒙示諭昨日所得過矣思無邪吾子自有老拙何爲
者神藥希代之寶理貫幽明未敢輕議少留諦觀俟
從者見臨迺面論也妙啜見分幸甚所問已得其端
通緩頰否不倦日烈見願爲望

與陳輔之

昨日承訪及病重不及起見愧仰深矣熱甚起居何如某萬里海表不死歸宿田里得疾遂有不起之憂豈非命耶若得少駐復與故人一笑此又望外也力疾書此數字

與徑山長老惟林

某臥病五十日日以增劇已頽然待盡矣兩日始微有生意亦未可必也適睡覺忽見刺字驚歎久之暑毒如此豈耆年者出山旅次時耶不審比來眠食何如某扶行不過數步亦不能久坐老師能相對語談少頃卽告晚涼叟一訪

又

嶺南萬里不能死而歸宿田野遂有不起之憂豈非命也夫然生死亦細故耳無足道者惟爲佛爲法爲衆生自重

重編東坡先生外集卷之八十一終

重編東坡先生外集卷第八十二

詞

水調歌頭

熙寧丙辰中秋。歡飲達旦。大醉。作此篇。兼懷子由。
明月幾時有。把酒問青天。不知天上宮闕。今夕是何
年。我欲乘風歸去。惟恐瓊樓玉宇。高處不勝寒。起舞
弄清影。何似在人間。轉朱閣。低綺戶。照無眠。不應
有恨。何事長向別時圓。人有悲歡離合。月有陰晴圓
缺。此事古難全。但願人長久。千里共嬋娟。

又

東坡先生集卷之八十二
余去歲中秋在東武作水調歌頭以寄子由相從
于彭城留百餘日過中秋而去亦作此曲以別余
余以其語過悲乃為和之其意以不早退為戒以
退而相從之樂為慰云

安石在東海從仕鬢驚秋中年親友難別綠竹緩離
愁一旦功成名遂準擬東還海道扶病入西州雅志
困軒冕遺恨寄滄洲歲云暮須早計要褐裘故鄉

歸去千里佳處輒遲留我醉歌時君和醉倒須君扶
我惟酒可忘憂一任劉玄德相對卧高樓此與曹

路同調也醉後思
我請令瀟女歌之

又

黃州快哉亭張君夢得謫居時作子瞻為之命此
名且賦詞

落日繡簾捲亭下水連空知君為我新構牕戶濕青
紅長記平山堂上歌枕江南烟雨杳杳沒孤鴻認取
醉翁語山色有無中一千頃都鏡淨磨一作碧峰
忽然浪起掀舞一葉白頭翁堪笑蘭臺公子未解莊
生天籟剛道有雌雄一點浩然氣千里快哉風

又

章質夫家有善琵琶者求余歌詞取退之詩稍加

彙括以遺之

昵昵兒女語燈火夜微明恩冤爾汝來去彈指淚和
聲忽變軒昂勇士一鼓填然作氣千里不留行回首
暮雲遠飛絮攪青冥衆禽裏真彩鳳獨不鳴躋攀
寸步千險一落百尋輕煩子指間風雨置我腸中冰
炭起坐不能平携手從歸去無泪與君傾

水龍吟

昔謝自然欲過海求師蓬萊至海中或謂自然蓬
萊隔弱水三十萬里不可到天台有司馬子微
居赤城名在絳闕可往從之自然乃還受道于子

微白日仙去子微著坐忘論七篇樞一篇年百餘
將終謂弟子曰吾居玉霄峰東望蓬萊嘗有真靈
降焉今爲東海青童君所召乃蟬退而去其後李
太白作大鵬賦云嘗見子微于江陵謂余有仙風
道骨可與神遊八極之表元豐七年冬余過臨淮
而湛然先生梁公在焉童顏清徹如二三十許人
然人亦有自少見之者善吹鐵笛遼然有穿雲烈
石之聲乃作水龍吟一首寄子微太白之事倚其
聲而歌之

古來雲海茫茫道山絳闕知何處人間自有赤城居

東坡先生集卷之八十三
士龍蟠鳳舉清淨無爲坐忘遺照八篇竒語向玉霄
東望蓬萊晻靄有雲駕參風馭行盡九州四海笑
紛紛落花飛絮臨江一見謫仙風彩無言心許八表
神遊浩然相對酒酣箕踞待垂天賦就騎鯨路穩約
相將去

東坡平生好道術聞輒行之但不能久又棄去談
道之篇傳世欲數百千字皆能書其人的欲言文
章皆雄竒卓越非人間語嘗有海上道人評東坡
真蓬萊方丈瀛洲謫仙人也流俗方以造次顛沛
秋毫得失欲軒輊困頓之亦踈矣哉山谷老人題

又

小溝東接長江柳堤葦岸連雲際烟村瀟洒人間一
閨漁樵早市永晝端居寸陰虛度了成何事但絲蓴
玉藕珠杭錦鯉相留戀又經歲因念浮丘舊侶慣
瑤池羽觴沉醉青鸞歌舞銖衣搖曳壺中天地颺塵
人間步虛聲斷露寒風細抱素琴獨向銀蟾影裡此
懷難寄

又咏鴈

露寒烟冷蕪葭老天外征鴻窠戾銀河秋晚長門燈
悄一聲初至應念瀟湘岸逢人靜水多菰米望極平

東坡先生集卷之二十三
四
田浦徘徊欲下依前被風驚起 須信衡陽萬里有
誰家錦書遙寄萬里雲外斜行橫陣繞踈又綴仙掌
月明石頭城下影擡寒水念征衣未擣佳人拂杵有
盈盈泪

又

鼓笛慢

閻丘太守孝終公顯嘗守黃州栖霞樓爲郡中勝
絕元豐五年予謫居于黃正月十七日夢扁舟渡
江中流回望樓中歌樂雜作舟中人言公顯方會
客也覺而異之乃作此曲盖越調鼓笛慢公顯時

已致仕在蘇州

小舟橫截春江卧看翠壁黃樓間起咲語使君高會
佳人半醉危柱哀絃豔歌餘響遶雲縈水念故人老
大風流未減獨迴首烟波裏 推枕惘然不見但空
江月明千里五湖聞道扁舟歸去仍携西子雲夢南
州武昌南岸昔游應記料多情夢裏端來見我也叅
差是 公顯後房名懿卿

又

次韻章質夫楊花

似花還似非花也無人惜從教墜拋家傍路思量却

東坡先生外集 卷之八 五
是無情有思縈損柔腸困酣嬌眼欲開還閉夢隨風
萬里尋郎去處又還被鶯呼起 不恨此花飛盡恨
西園落紅難綴曉來雨過遺蹤何在一池萍碎春色
三分二分塵土一分流水細看來不是楊花點點是
離人泪 舊說楊花落水爲浮萍驗之信然

又

贈趙晦之吹簫侍兒

楚山修竹如雲異材秀出千壺表龍鬚半剪鳳膺微
漲玉肌勻燒木落淮南雨晴雲夢月明風嫋自中郎
不見桓伊去後知辜負秋多少 聞道嶺南太守後
堂深綠珠嬌小綺窓學弄涼州初遍霓裳未了嚼徵
含宮汎商流羽一聲雲杪爲使君洗盡蠻風瘴雨作
霜天曉

滿江紅

密州上巳作州城南有坡土色如丹其下有堤壅
却淇水入城

東武南城新堤上却淇初溢

一作新堤固連漪初溢一作微雨遍高阜

卧紅堆碧枝上殘花吹盡也與君試向作更溪邊覓
問向前猶有幾多春三之一 官裏事何時畢風雨
外無多日相將汎曲水滿城爭出君不見蘭亭修禊

事當時座上皆豪逸到如今修竹蒲山陰空陳迹

又

雪中送王定國

天豈無情天也解多情留客春向暖朝來底事尚飄
輕雪君遇時來紆組綬我應老去尋泉石恐異時杯
酒忽相思雲山隔浮世事俱難必人縱健老應白
何辭更一醉此歡難覓不用向佳人訴離恨泪光先
已凝雙睫但莫遣新燕却來時音書絕

又

董義夫以瀘南軍事奪官爲民晚娶少妻能同甘
苦能使義夫忘其淪落故爲作此曲乃知雲安軍

柳韶之女

憂喜相尋風雨過一江春淥巫峽夢至今猶有亂山
屏簇何似伯鸞携德耀簞瓢未足清歡足漸粲然光
彩照階庭生蘭玉幽夢裡傳心曲腸斷處憑它續
文君婿知否笑君卑辱君不見周南歌漢廣天教夫
子休喬木便相將左手抱琴書雲間宿

又

寄鄂州朱使君

江漢西來高樓下蒲萄深碧猶自帶岷峨雪浪錦江

春色君是南山遺愛守我爲劍外思歸客對此間風
物豈無情殷勤說江表傳君休讀狂處士真堪惜
空洲對鸚鵡青花蕭瑟不獨笑書生事底事曹公黃
祖俱飄忽願君還賦謫仙詩追黃鶴

又

清潁東流愁自斷孤帆明滅遊宦處青山自浪萬重
千疊暮負當年林下意對床夜雨聽蕭瑟恨此生長
向別離申添華髮一樽酒黃河側無限事從頭說
相看恍如夢許多年月衣上舊痕餘苦泪眉間新喜
黃色便與君池上香花如雪

江城子

一作江神子

陳述古去餘杭爲去思者作

翠娥羞黛怯人看掩霜紈泪偷彈且盡一杯收泪唱
陽關謾道帝城天樣遠天易見見君難画樓新構
近孤山曲欄干爲誰安飛絮落花春色屬明年欲棹
小舟尋舊事無處問水連天

又

密州雪中送客

相從不覺又初寒對尊前惜流年風緊離亭冰結泪
珠圓雪意留君君自住從此去少清歡轉頭山上

轉頭看路漫漫玉花翻銀海光寬何處是超然知道
故人相念否携翠袖倚闌干

一作朱欄

又

徐州行獵

老夫聊發少年狂左牽黃右擎蒼錦帽貂裘千騎巷
平岡爲報傾城隨太守親射虎看孫郎酒酣胸胆
尚闢張鬣微霜又何妨持節雲中何日遣馮唐會挽
彫弓如滿月西北望射天狼

又

夢初室王氏

乙卯正月十二日

十年生死兩茫茫不思量自難忘孤墳無處話淒涼
縱使相逢應不識塵滿面鬢如霜夜來幽夢忽還
鄉小軒窻正梳妝相顧無言惟有泪千行料得年年
腸斷處明月夜短松崗

又

陶淵明以正月五日遊斜川臨流班坐願詹南阜
愛魯城之獨秀乃作斜川詩至今彼人想見其處
元豐壬戌之春予躬畊於東坡築雪堂居之南挹
四望亭之後丘西控北山之微泉慨然而嘆此亦
斜川之遊也乃作長短句以江城子歌之

東坡先生集卷之八十一
九
夢中了了醉中醒只淵明是前生走遍人間依舊却
躬畊昨夜東坡春雨足烏鵲喜報新晴 雪堂西畔
暗泉鳴北山傾小溪橫南望亭丘孤秀聳曾城都是
斜川當日境吾老矣寄餘齡

又

別徐州

天涯流落思無窮既相逢却匆匆携手佳人和淚折
殘紅爲問春風餘幾許春縱在與誰同 隋堤三月
水溶溶背歸鴻去吳中回望彭城清泗與誰通寄我
相思千點泪流不到楚江東

又

陳直方妾嵇錢塘人求予作此詞錢塘人好唱陌
上花緩緩曲余嘗作詩記其事云

玉人家在鳳凰山水雲間掩門閉門外行人立馬看
弓彎十里春風誰指似斜日暎 綉簾斑 多情
好事與君還閑新鰥拭餘潛明月空江香霧着雲鬟
陌上羣花開盡也聞舊曲破朱顏

又

湖上與張先同賦

鳳皇山下雨初晴水風清晚霞明一朶芙蓉開過尚

盈盈何處飛來雙白鷺如有意慕娉婷 忽聞江上
弄哀箏苦含情遣誰聽烟歛雲收依約是湘靈欲待
曲終尋問取人不見數峰青

又

雪中懷朱康叔

黃昏還是雨纖纖曉開簾欲平簷江濶天低無處認
青帘孤坐凍吟誰伴我指病目撚衰髯 使君留客
醉厭厭水晶鹽爲誰甜手把梅花東望憶陶潛雪似
故人人似雪雖可愛有人嫌

又

膩紅勻臉襯檀唇晚粧新暗傷春手撚花枝誰會
眉顰連理帶頭雙 留待與箇中人 淡烟籠月
繡簾陰画堂深夜沉沉誰道 繫得人心一自
綠窓偷見後便憔悴到如今

稍遍

陶淵明賦歸去來有其詞而無其聲余治東坡築
雪堂於其上人皆咲其陋獨鄱陽董毅夫過而悅
之有卜隣之意乃取歸去來詞稍加櫟括使就聲
律以遺毅夫使家僮習歌之相將遊于東坡釋耒
而和之扣牛角而爲之節不亦樂哉其詞曰

為米折腰因酒棄官身口相交累歸去來誰不遣君
歸覺從前俱非今是露未晞征夫指余歸路門前咲
語喧童稚嗟舊菊都荒新松暗老吾年今已如此但
小牕容膝閉柴扉策杖看孤雲暮鴻飛雲出無心鳥
倦知還本非有意 噫歸去來今我今忘我兼忘世
親戚無浪語琴書有真味步翠麓崎嶇汎溪窈窕涓
涓暗谷流春水觀草木欣榮幽人自感吾生行且休
矣念寓形宇內復幾時不自覺皇皇欲何之委吾心
去留誰計神仙知在何處富貴非吾志但知臨水登
山嘯咏自引壺觴自醉此生天命更奚疑且乘流過

坎還止

其詞蓋世所謂般瞻之稍遍也般瞻龜茲語也華
言為五聲蓋羽聲也於五音之次為第五今世作
舛呖誤矣稍遍三疊每疊加促字當為稍讀去聲
世作哨或作呖皆非是

又

睡起画堂銀蒜押簾珠幙雲垂地初雨歇洗出碧羅
天正溶溶養花天氣一霎暖風迴芳草榮光浮動卷
皺銀塘方水杏靨勻酥花鬚吐綉園林排比紅翠見
乳鶯梢蝶過繁枝忽一線爐香逐遊絲晝永人閑獨

立斜陽晚來情味 便乘興携將佳麗深入芳菲裡
盡撥胡琴語輕攏慢撚聽利看繫約羅裙急趨檀板
霓裳入破驚鴻起顰月臨眉醉霞橫臉歌聲悠颺雲
際任滿頭紅雨落花飛漸鳩鵲棲西玉蟾低尚徘徊
未盡歡意君看今古悠悠浮宦人間世這些百歲光
陰幾日三萬六千而已醉鄉路穩不妨行且人生要
適情尔

重編東坡先生外集卷之八十二終

